

# INUIT ATAQATIGIIT INATSISARTUNI



13. februar 2022

UPA2022/ 39

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Ukiut tamaasa ullormi 13. September Naalackersuisut paasisitsiniaanermik ingerlatsisarnissaannik inatsisartut aalajangiiffigisassatut siunnersuut. Paasisitsiniaanermi plastikkit ataasiaannarlugit atortakkat kingunipiluunik qaammarsaanermik siunertassaaq. Paasisitsiniaanerup siunertarissavaattaq plastikkip pinngortitamut innarliisarnera qaammarsaatigineqassaaq kiisalu plastikkimik atuinerup annikillisarnera siunertaralugu innuttaasunut periarfissanik tikkuussinikkut plastikkinik atuinerup annikillisarneqarsinnaanera.**

(Inatsisartunut ilaasortaq Pipaluk Lynge Rasmussen, Inuit Ataqatigiit)

## **Tungavilersuut:**

Plastik imaaliallaannaq nungussinnaangilaq. Nunamut piguni, eqqoriarneqartarpoq ukiut 400-600-ut nunap arrortinniarsarissagaa, ukiorpassuarnilu taakkunani, uumasorpassuit aqquusaarsinnaavai, ilaatigut aamma inuk aqquusaarsinnaallugu, mattungaarmat, arrortikkuminaangaarmat.

Nunarsuarmi plastik ataasiaannaq atortagaq nunani arlalipparujussuarni inerteqqutaalernikuuvoq.

Maani Naalackersuisut aamma plastik ataasiaannaq atortagaq aamma annikillisarnerlugu aamma suliniuteqartut nalunngilara, innuttaasulli pilersaaruserni aaliangersakkanilu peqataatinneqaleraangasa, sunniutai annertunerulersarput.

Nuna tamakkerlugu plastikkimik atuinnginnissamik ullorititaqalernikkut, innuttaasut aamma avatangiisitta paarilluarnissaanik eqqumaffiginerulissavaat, namminnerlu ulluinnarni ileqqutik maluginialerlugit, qanoq akulikitsigisumik plastik ulluinnarni atugarisarnarlugu, immaqaa taamak piniangeruttorlutik.

Pingaartitagut qiviarutsigit, avatangiiseq; nuna, imaq silaannarlu - minguitsut kissaatigaagut, taamak ittoq inuuffigigatsigu, inuussutigalugulu. Minguissuserli nammineq takkunneq ajorpoq. Inuup iliuusai pilersitaalu aaliangiisuusarput, soorlu siulitta avatangiiseq ataqquilluinnarlugu inuusimasut, uagut ataasiaannaq atortakkanik taarsertuusilersimagipput. Ullaakkut kaffisiniarnermi kaffisorfik ataasiaannaq atortagaq, naatitarsinermi plastik ataasiaq atortagaq, ulloqqeqasiutisinermi nerisassat puui ataasiaannaq atortakkat, aamma nerinermi saviit ajassaatillu ataasiaannaq atortakkat. Inuup maluginialerpagu suna ataasiaannaq atortarnerlugu, ileqquni allangortinniarsinnaangussavai, ataasiaannaq atunngitsunik ileqquleqalernermigut, taamaasilluta nunatsinnut eqquussuuttakkagut ataasiaannaq atugassiaatikkunnaarlugit, avatangiisimut innarliinngitsunik taarsersulersinnaangussavagut.

Avatangiisip paarinerasigut, inummut aamma tuttussaammat, kimulluunniit ulloq una ulloritinneqarsinnaavoq, avatangiiseq tamatta atugaralugulu pisinnaatitaaffigigatsigu.

Indianerit ilaasa oqartarneratut: “nuna meeqqatsinnit attartorparput, meeqqatta kingornussassarimmassuk.” Meeqqatsinnut ingerlateqqitsigu minguisseq, atueriaaseq isumatusaartoq, ataasiaannaq atortagaq inuunerannut ilaangittoq.

**Pisortanut aningaasatigut allaffissornikkullu kingunerisassai:**

Paasisitsiniaanerup qanoq annertutiginnissaa appeqqutaalluni pisortanut aningaasatigut kingunissai inissinneqassapput. Siunnersuutigaara paasisitsiniaanermut aningaasat ukiumut kr. 500.000,- tungaanut atorlugit ingerlanneqarsinnaavoq.

**Namminersortunut aningaasaatigut allaffissornikkullu kingunerisassai:**

Soqanngilaq

**Innuttaasunut aningaasatigut allaffissornikkullu kingunerisassai:**

Soqanngilaq